

Govor predsjedavajućeg Doma naroda Parlamentarne skupštine Bosne i Hercegovine Kemala Ademovića na Petoj godišnjici konferencije Lige parlamentaraca za AI – Quds

Istanbul, 27. april 2024.

„Cijenjeni i visoko poštovani predsjedniče Republike Turske, vaša ekscelencija Recep Tayyip Erdoğan,

Uvaženi predsjedniče Velike narodne skupštine Republike Turske, profesore doktore Numan Kurtulmuş,

Poštovani predsjedniče Lige parlamentaraca za AI-Quds, gospodine Hamid Abdullah Al Ahmar, kao i predsjedniče Lige parlamentaraca za AI-Quds Turske, gospodine Nureddin Nebati,

Drage kolege parlamentarci, dame i gospodo,

ovaj visoko cijenjeni skup parlamentaraca iz cijelog svijeta se sastaje u neizmjerljivo važnom momentu za čovječanstvo.

U trenucima dok razgovaramo palestinski narod se nalazi pod brutalnom prijetnjom biološkog nestanka.

Kakav smo to svijet postali!? Dok šaljemo satelite u svemir, dok presađujemo organe i produžavamo živote smrtno oboljelih, dok stvaramo vještačku inteligenciju i pravimo pametne telefone da u svakom trenutku možemo vidjeti cijeli svijet pred sobom – ne možemo zaštititi djecu da ih ne ubijaju! Za šta nam služe pametni telefoni – da gledamo raskomadane leševe i gladnu i uplakanu palestinsku djecu! I svu drugu djecu koju ubijaju diljem svijeta, ma koje nacije i vjere bili!

Prije nekoliko mjeseci u Sarajevu, na velikoj NATO konferenciji sa preko 130 prisutnih zvaničnika, rekao sam da smo kao civilizacija iznijeli mnoge velike i teške revolucije, ali da smo pali na jednom testu – nismo uspjeli zaštititi civile u ratovima! A sve revolucije i sva naučna i tehnološka dostignuća izgledaju tako sitno i bezvrijedno pred mrtvim tijelom jednog nedužnog djeteta!

Danas moramo podići svoj glas i učiniti sve, baš sve što je u našoj moći da zaštitimo živote nevinih ljudi, staraca, žena i djece Palestine. Današnji skup je skup predstavnika stotina miliona ljudi koje zastupamo i njihov glas se mora čuti!

Ja dolazim iz Bosne i Hercegovine, iz naroda koji je preživio genocid. Potpuno mi je jasno sve ono što se danas dešava u Palestini i strah me da će palestinski narod doživjeti isto ono što je doživio moj bošnjački narod. Ili ga je već doživio, samo je ostalo da neki međunarodni sud to i potvrdi – da je izvršen genocid nad palestinskim narodom!

Pozdravljam odluku Međunarodnog suda pravde od 26. januara ove godine da usvoji privremene mjere i naloži Izraelu da hitno i bez odlaganja obustavi sve radnje koje mogu imati za posljedicu bilo koji čin genocida.

Pozivam sve članice Ujedinjenih nacija (UN) da poduzmu sve mjere u skladu sa međunarodnim pravom i zaustave stradanje palestinskog naroda.

Bošnjački narod u Bosni i Hercegovini i danas živi posljedice genocida i de fakto i de jure iako je Međunarodni sud pravde 26. februara 2007. godine presudio da se u Srebrenici 1995. godine desio genocid. Bojim se da će obećanje „nikad više“ da se danas prekrši u Palestini kao što se desilo u Srebrenici, a sutra ko zna gdje.

Zato moramo osigurati da naša obećanja ne završavaju na političkim porukama nego na sigurnim pravnim i faktičkim mehanizmima zaštite života ljudi ma koje rase, vjere, etničke ili nacionalne pripadnosti bili.

Kao predsjedavajući Doma naroda PSBiH pozivam na momentalni prekid oružanih dejstava u Palestini i rješavanju svih otvorenih pitanja mirnim putem i pregovorima!

Možda je moja zemlja geografski i populacijski mala, ali mi imamo potpuno pravo i legitimitet da svoj stav o stradanju i genocidu iskažemo, a cijeli svijet zna i zašto. Nadam se da će Generalna skupština UN uskoro usvojiti Rezoluciju o Srebrenici i time još jednom potvrditi to naše moralno pravo, ali i poslati poruku da će počinitelji genocida, ma gdje i ma ko oni bili, ostati vječno upisani na tamnoj strani historije i da će taj teret biti stavljen i na pleća njihovih potomaka, koji nisu biti krivi za zločine koje su njihovi očevi ili djedovi počinili. Nadam se da će nove generacije političara uskoro smoći snage da zdravorazumski pristupe velikom zadatku suočavanja sa prošloću kako bi smo zajedno radili na poboljšanju odnosa među našim narodima na bazi istine i pravde.

Na kraju, sve propuste koje je međunarodna zajednica napravila u Bosni i Hercegovini ne smijemo ponoviti danas u Palestini!“